

INUIT ATAQATIGIIT INATSIARTUNI



UPA 2023/10

24. maj 2023

Asii Chemnitz Narup

Aningaasaqarnikkut Ingerlatsineq pillugu Nalunaarut 2023

(Aningaasaqarnermut Naligiissitaanermullu Naalakkersusioq)

Oqaaseqat:

Aaqqissuusseqqinnermi ersarissunik pingaarnersiuisariaqarpugut

Aallaqqaasiut

Inatsisartut oqaluuserisassaanni imm. 10 'Aningaasaqarnikkut Ingerlatsineq pillugu Nalunaarut', upernalerneranik oqariartuutsitaliaavoq. Ukiuni arlalissuannortuni upernaat tamaasa oqaluuserisassani aalajangersimasumik ilaatinneqartarluni. Qaamarngup uteqqinneranik, aputip aanneranik ivikkallu qorsutsikkiartornerinik, nipisaat, minnerunngitsumillu suaasa mamartut qungujulaarnermik pilersitsinerisa nalaanni, kangerlunnilu tikaagulliit takussaalerneerit aasap takkukkaluttuarneranik ilimasaartarpaatigut.

Nalunaarutip aningaasaqarnikkut pissutsit qanoq maannakkorpiaq qanoq inissisimanerannik eqikkaasumik oqaluttuutiinnanngilaatigut. Inuiaqatigiittulli qanoq ingerlariaqqinnissatsinnut oqallinnissatsinnut aallaavissatsialaavoq. Aningaasaqarnikkut patajaatsumik attanneqarsinnaajuartussamillu

INUIT ATAQATIGIIT INATSIARTUNI



inissisimanissaq qanoq iliorluta qulakkeersinnaavarput? Aaqqissuusseqqinnerit suut ikorfartuutigisinnaavavut? Aaqqissuusseqqinnerit suut aalajangijutissavagut? Minnerunngitsumullu – aaqqissuusseqqinnissami illerngit assigiinngitsut imminnut ataqatigiinnissaat qanoq iliorluta qulakkeersinnaavagut?

Nalunaarusiamut soqutiginantumut, ataatsimoorluta piffissamut ungasissumut, angisuunik siammasissunillu eqqarsaqatigiinnissatsinnut periarfissiissumut Naalakkersuisoq qutsavigissavarput.

Nalunaarusiami immikkoortut ilaannut siunissami Napatitsinissamut Siuarinartornissamullu pilersaarut 2 aallaviginerullugu Inuit Ataqatigiit oqaaseqaateqassaagut.

Inuit Ataqatigiit anguniagai

((Kalaallit Nunaat nukittoq imminullu tulluusimaarutigisoq Inuit Ataqatigiit kissaatigaat, Kalaallit Nunaat kiffaanngissuseqarluni namminersortoq, inuusuttavut ilinniarluarsimasut, innuttaasut naligiissut, uagullu namminiussasugut Kalaallit Nunaajulluta – taamaakkaluartorli aamma Nunarsuarmioqataalluta. Inuussutissarsiutitigut ineriartorneq nammineerluta akisussaaffigissagipput, suliffissanillu pilersitsilluta aamma tamanut inissianik pitsaasunik peqqinnartunillu pilersitsilluta. Meerartavut utoqqartarvullu tamatta paarilluassagigut. Atornerluinerit pinngitsaaliinerillu akiorlugit nungutsissagivut, assigiinngisitsinerlu tamaat atorunnaarsissagipput....

Piujuartitsineq tunaartaralugu politikikkut aningaasarsiornikkullu imminut napatinnssaq Inuit Ataqatigiit sulissutigaat. Aningaasaqarnermut politikki peqataassaaq naligiinnerulernissamut, piitsuussutsip akiorneqarneranut, inuiaqatigiinnilu pisuussutinut naligiissumik pissarsisinnaanissatsinnut.

INUIT ATAQATIGIIT INATSISARTUNI



Inuiaqatigiit ineriartornerannut demokratiskiusumik peqataanissaminnut, inuiaqatigiillu ataqatigiinnerisa nukittorsarneqarnissaannut innuttaasut periarfissaannut ikkorfartueqataassallutik. Inuit pineqarput.

Aningaasarsiornikkkut annertusaanissaq periarfissiuuttuarnissaa Inuit Ataqatigiit eqqummaariffigaat. Annertusaajuarnissaq immi siunertarinngikkaluarlugu, kisianni atugarissaarnissaq qulakkeerniarlugu, inuit tamarmik piginnaasaminnik ineriartortitsisinnaaneri qulakkeerniarlugit, suliffeqarnissaat imminnullu pilersornissaat qulakkeerniarlugit, atugarissaanerup aamma pigissaanerup annertuisiartuinnarnissaat qulakkeerniarlugit.

Inuit aningaasarsiornermi pineqarput))

Aningaasaqarnitta maannakkorpiaq inissisimamera

Ukiuni kingullerni arlalinngulersuni nappaassuup Covid 19-ip atuunnerata nalaani kingornalu, Ruslandip Ukrainimut sorsulernarata kingorna aamma silap pissusaata allanngoriartupiloornerata kingunerisaanik, Nunarsuatta inuuffigissallugu sillimaniarnarnerulernera siunissamullu siulittoruminaannerulernera – tamakkualu malittigisaanik aningaasarsiornikkut, peqqissutsikkut aamma niueqatigiinnikkut kinguneri misinnartut - tamarmiugunarluta misigisimalereersimavarput.

Aammaarluta eqqaaseqqinneqartaraagut nunarsuarmioqataalluta, nunarsuattalu ilaani allani pisut uagut ulluinnarni inuunitsinnut aamma sunniuteqartartut.

Aningaasaqarniarnerput tunngaviatigut pitsaasuvoq. Nunanut allanut naleqqiulluta aningaasat naleerukkiartornerinit tatineqarnerput

INUIT ATAQATIGIIT INATSIARTUNI



annikitsuinnaavoq. Danmarkimiit ataatsimoortumik tapiiffigineqartarnitta aamma uuliamik diselinillu nioqqutissiatigut akinik isumaqatigiissuteqareertarnerput akit naleerukkiartornerisa annikitsuinnaanerinut peqqutaqaapput.

Akilli qaffakkiartorneri aamma uatsinnut malunniupput: assartuinernut akit, sanaartugassanut atortussat, inuussutissallu akiinut. Avataaniit nioqqutissanik eqqussukkanik pilersorneqarnissatsinnut pisariaqartitsinerujussuatta, inoqutigiinni aningaasartuutit qaffassinerulernerinut malunarluartumik sunniuteqarpoq.

Taamaattumik aningaasarsiornikkut pitsaasumik inissisimanitsinnik oqaaqaangatta, Inuit Ataqatigiinniit pingaartipparput erseqqissassallugu maannakkorpiaq pissutsit isigalugit taama naliliinerummat.

Unammilligasat

Ukiuni kingullerni 10-15-ini eqqartorneqartorujussuusimavoq "qunnersuup ikertusiartuinnaarnera/ 'arferup aatsaraluttuinnaarnera'/ 'atugarissaarnermi nalorninartorsiorfik': innuttaasut katitigaanerisa allanngoriartornerat najoqqutaralugu, inuiaqatigiinni atugarissaarfiusuni ajunngitsorsiassat inunnik amerlanerusunik atorfissaqartinneqartarneri, illuap tungaanilu inuit landskarsimut akileraarutinik akiliisartut, ajunngitsorsiassanillu akilersueqataasut, ikiligaluttuinnaartut.

Nunarsuarmilu silap pissusaata allanngoriartornera peqqutigalugu ajornartorsiutit aamma aningaasartuutissanik nutaanik pisariaqartunik pilersitseriaannaapput.

Isertitarineqartartuniit pisortat aningaasartuutigisartagaat, piffissaq sivisoorsuunngitsoq qaangiuppat, amerlanerulersussaapput. Napatitsinissamut ajornartorsiutit siunissamut qulakkeerneqarnikuunngillat. Taamaapput !

INUIT ATAQATIGIIT INATSISARTUNI



Akisussaassutsimik takutitseqatigiitta, pisortallu aningaasaqarniarneranni oqimaaqatigiinnermik ukiuni tullerni 10-12-ni pilersitsisinissatsinnut anguniagaqatigiilluta.

Unammilligassamut tassunga politikikkut sakkussarput tassa napatitsinissamut siuariartornissamullu pilersaarut. Aningaasaqarnikkut piujuartitsinissaq tassaavoq aningaasartuutissat aamma isertitassat maanna siunissamilu oqimaaqatigiisinnissaat. Pisortat missingersuusiarisartagaannik suliaqarluni pilersaarusiormi pingaaruteqartuuvoq aningaasartuutissat aamma isertitaqarnissamut toqqammavissat tamaasa ataatsikkut suliarineqarnissaat.

Ajornanngitsunik aaqqiissutissaqanngilaq, akunnattoorfissarpassuaqarpoq

Unneqarilluta immitsinnut oqarfigisariaqarpugut aningaasartuutissatigut aamma isertitassatigut unammilligassaqaratta.

Landskarsimut isertittakkatta 50 %-tii sinnerlugit Ataatsimoortumik tapiissutineersuupput. Taakkua saniasigut aalisarnermit avammut niunermit isertittakkavut pinngitsoorsinnaanngivippavut. Isertinneqarsinnaasunik nutaanik qulakkeerinnittariaqarpugut.

Utoqqarnik pilersueqataasinnaasut inuusuttut ikiligaluttuinnarput. Piffissaq ungasippallaanngitsoq ungasinnerusorlu qiviarlugit Peqqinnissaqarfiup makiteqqinnissaanut pilersaarut akisooq partiit akornanni isumaqatigiissutigineqartariaqarpoq. Inuit Ataqatigiit pingaarnersiuinissamut kissaatigut piareerpagut. Isumaliutissiissummut pitsaasumut Peqqinnissaqarfik pillugu Ataatsimiititaliarsuarmut qujanaq.

Inunnik isumaginnittoqarfik tamarmi pitsaanerulersinneqartariaqarpoq.

INUIT ATAQATIGIIT INATSIARTUNI



Naligiinngissuseq aamma ilaqutariit meerartallit isertitakitsuararsuullutik inooqataasut aamma pissusiviusunut ilaapput. Inuusuttut meeqqat atuarfiannit ingerlaqqinneq ajortut amerlavallaarput. Ila, suliassarpassuaqarpugut. Ajornartorsiutit nammineerlutik peerunnaviannigillat. Politikikkut sapiissuseqarnissaq, suleriuseqarluarsinnaaneq aamma aningaasat kissaatigivavut.

Isertitassat tungaasigut aamma aningaasartuutissat tungaasigut aningaasaqarnerput qajannarput.

Qanoq iliuseqarnissamut piffissanngorpoq – NSP 2

Napatitsinissamut Siuariartornissamullu pilersaarutip 2-p sularinera 2019-imili aallartippoq. Pilersaarut maanna naammasisutut oqaatigineqarsinnaavoq. Pisortat aningaasaqarnerini oqimaaqatigiissumik pilersitsinissamut siunertat ukioq manna aqqissuuseqqinnissat aamma suliniutissat Nalunaarusiami saqqummiunneqartut naammassiniarnissaannut Naalakkersuisut aallartinniagaat sakkussaapput.

Aqqissuuseqqinnissamut suliniutit sisamaapput. Taakkua immikkoorlutik ataatsimoorlutillu atugarissaarnermi akunnattoorfinnit qaangiitittussaavaatigut.

Aqqissuuseqqinnissamut suliniutit taakku sisamat pillugit Inuit Ataqatigiit isumaliutersuutaannik kissaataannillu avitseqatiginiarpatsigit.

Aqqissuuseqqinnissap illernga 1: Ilinniartitaanerup pisinnaasallu kivinnejarnissaat.

Inooqatigiinnikkut piujuartitsinissamut siunertami ilaatigut qulakkearniarneqarpoq inuusuttut ilinniagaqarnissaat. Ukiuni qulikkaaruni arlalinngortuni ilinniartitaaneq pingaarnersiuinerni qullersaajuartarsimavoq.

INUIT ATAQATIGIIT INATSIARTUNI



Maanna piffissanngorpoq immitsinnut aperissalluta ilinniartitaanerit assigiinngitsut akornanni sorliit pingaarnertissanerlutigit.

Pingaarnersiuisariaqarpugut.

Inuiaqatigiinni pisariaqartinneqartut toqqaannartumik siunertaralugit ilinniartitaanissamut neqeroorutit pingaarnersiorneqarnissaat Inuit Ataqatigiit isumaqatigaat. Ilinniarfissat assigiinngitsut akornanni pingaarnersiuinissamut aalajangernissamullu sapiissuseqartariaqarpugut. Uagut siunnersuutigarpugut peqqinnissaqarfimmi suliassaqarfiit aamma isumaginninnermi suliassaqarfiit pingaarnertinneqassasut. Taakkunani sulisussaaleqinerujussuaq ajornartorsiuterujussuvoq.

Aalisarneq, nunatsini inuussutissarsiutit pingaarnissaat ilinniartitaanikkut immikkut ittumik kivinneqartariaqarpoq.

Sanaartornermi inissialiornernilu assassorlutik sulisartussat ilinniartinneqarnissaat aamma pingaartinneqartariaqarpoq.

Assassornikkut atuagarsornikkullu ilinnakkat assigiimmik naleqarpugut.

Inuussutissarsiuteqalernissamut ilinnialersussat amerlanerulersissagutsigit PISARIAQARPOQ Meeqqat Atuarfiani atuartitsisarnerup nalilersueqqiffiqineqarnissaa. Nunatsinni Aningaasaqarnermut Siunnersuisoqatigiit ukiakkut 2022-mi nalunaarusiaminni Meeqqat Atuarfiat pillugu pingaarutilimmik allaaserisaqarpugut. Tassani erseqqippoq meeqqat atuarfiini periarfissaritinneqartut pitsaassutsillu assigiinngitsorujussuusut, apeqqutaalluni nunap immikkoortuani sumi najugaqarneq.

Ilumoorsinnaangilaq nunaqarfimmi inukinnerusumi inunngorsimanerit pissutigalugu atuarfiup nammassinerani ajornerusunik periarfissaqassasutit. Ilinniaqqinnissamut ingerlaqqinnissaminnut inuusstortavut tamarmik assigiinnik periarfissaqartariaqarpugut. Taamaattoqanngippat suli imminnut

INUIT ATAQATIGIIT INATSIARTUNI



akisussaaffigilinngitsulluunniit sulilernissamut kingullerpaanngorlugit inuusuttut ilaat inississavavut.

Meeqqap inuunera pitsaasoq meeqqap atualinnginneranili tunngavissinneqartarpoq (tunngaviusumik oqarsinnaavugut meeraq naartutut suli anaanami naaviniittoq inuuneq pitsaasoq aallartereertartoq). Perorsaasunik amingaateqarnerujussuarput peqqutigalugu aarleqqutigaarput, ineriartorluarnissaminnut perorsaanikkut neqeroorutinik, inatsimmi 2012-meersumi piumasarineqartutut, meeqqat amerlaneruleralluttuinnartut pissarsininngitsoortarnissaat. Amerlanerusut perorsaasutut ilinniartinneqarnissaat NUKINGINNARTORUJUSSUUVOQ.

Aaqqissuusseqqinnermi illerngit aappat: Piujuartitsisumik ineriartortitsineq aamma aningaasarsiornikkut sukarsuit arlallit.

Tamatsinnit isumaqatigiissutaavoq inuussutissarsiornikkut ataasiinnarmik toqqammaveqarnerup – aalisarnermik aallaaveqartup – aningaasarsiornikkut qajannartuutikkaatigut. Aamma tamatta isumaqatigivarput inuussutissarsiutini sukarsuup taassuma aaqqissuussiffigeqqinneqarnissaa. Aalisarnermut inatsisitaassami tunngavissat Inatsisartuni isumaqatigiissutaasinnaassanerpat?

Tamakku pillugit politikkikkut oqaloqatigiinnerit aallartimmata nuannaarutigaarput. Inuit Ataqatigiinni kissaatigaarput aalisarnerup iluani soqutigisat, imminnut akerleriissinnaasut akornanni, paaseqatigiittoqarnissaa, aalisarnerullu iluani Inatsisartuni tamattaalluta isumaqatigiissuteqarnissarput. Aalisarnermut inatsississamik siunnersuutissap saqqummiunneqarnissaa erininarsivoq.

Maluginiarparput niueqatigiinneq pillugu Tuluit nunaannik isumaqatigiinniarnert aatsaat ukiaq manna naammassineqarnissaat

INUIT ATAQATIGIIT INATSISARTUNI



ilimagineqartoq. Aamma maluginiarparput akileraarusersugaanngitsunik niueqatigiinnissamik isumaqatigiisummi isummat tunngaviusut nalilersueqqiffigineqarnissaannik Naalakkersuisut ilimasaarutaat. kaammattuutigissavarput Aningaasaqarnermut aamma Inuussutissarsiornermut ataatsimiititaliamik Naalakkersuisut suliami uani qanimut suleqateqarnissaat.

Inuussutissarsiutit annertunerusumik nutaamillu ineriartortinneqarnissaannut pilersitserusunermut Inuit Ataqatigiit isumaqataalluinnarnerat qularutigineqassanngilaq. Takornariaqarnerup ineriartortinneqarnerani pitsaasunik periarfissaqarpoq aamma unammillingassaqarpoq. Tupaallaatiginngitsuunngilarpulli takornariaqarnermut periusissiaagallartussamik suliaqaatigalutik, 2025-imi aatsaat inaarlugu saqqummiussinissartik Nnaalakkersuisut nalunaarutigimmassuk.

Nukissiuutit ningutsitsinngitsunut ikaarsaarnissaq inuussutissarsiornikkut ineriartortitsinerup nutaaliorfissaatut ineriartortitsiffiusussatut Inuit Ataqatigiit isigimmassuk tupaallaatigineqarsinnaanngilaq.

Innaallagissiornitta 70 %-tia mingutsitsinngitsumeersuuvoq, erngullu nukiliorfii nutaat atulerpata innaallagissiatta 90 %-tii mingutsitsinngitsuneersuussapput. Imermilli isumalluuterujussuarput innaallagissiornerinnarmut atorunngilarput. Imerk isumalluutitta aningaasarsiutitut avammut nioqqutissiarineqarnerulernissaanut periarfissaqartorujussuuvoq. Pissusissamisoorluinnarpoq nunarsuatsinni mingutsitsinngitsut piurmaneqaleraluttuinnarnerisa uatsinnit atorluarneqarnissaat.

Nunarsuarmioqatigiinni avatangiisinut silallu pissusaanut miannerinninnerulerneq, nunallu tamalaaat Issittumut soqutigisaqaleraluttuinnarnerat atorluartariaqarpoq, inuussutissarsiutillu

INUIT ATAQATIGIIT INATSISARTUNI



ineriartorfissaatut periarfissatsialattut isigalugu, silap
kissatsikkaluttuinnarneranik annikilliliisussatut aamma nunarsuatta
piujuaannarnissaanut qulakkeerinneqataasussatut.
Unammillingassarpassuaqarpugut suli – nukissiuutinik atuinitsinni 84 % suli
mingutsitsisuupput.

*Aaqqissuusseqqinnermi illerngit pingajuat: Pisortat ingerlatsivii siunissamut
qulakkeerneqartariaqarput*

Siunissamut aaqqissuuseqqinnissami illineq una ilanngunneqarsimammat
nuannaarutigaarput. Ukiorpanngortuni partiit tamarluinnangajammik
kissaatigisarsimavaat pisortat ingerlatsiviini, Namminersorlutik Oqartussani
aamma kommunini, nutaamik aaqqissuussisoqarnissaa. 2005-imi
aaqqissuusseqqinnissamut ataatsimiititaliaq nutaaliornissamut isummanik
tunngaviusussanik saqqummiussigaluarpoq, ilaannamineerannguili
piviusunngortinneqarnikkuput.

Politikkikkut aalajangiinissamut tunngavissanut qaninneruleqqulluta Inuit
Ataqatigiit siunnersuutiginiarpaat PhD-liortumut ataatsimut arlalinnulluunniit,
pisortat ingerlatsiviisa nutarteriffigineqarlutik aaqqissuuteqqinnissaannut
sulinissami siuttussatut sulisussanut aningaasaliisoqassasoq. Takorlooriartigu
innuttaasunik sullissinnermi 'empowement'-imik periutsit tunngavigalugit
aaqqissuussisinnaagutta, qanoq pitsaatigissagaluarnerasoq. Ullumikkut
sullissinnermi sulisuvut aamma innuttaasut ima nakkutigineqartigaat, ilaanni
ileqimisaartuinnartariaqartarluta.

Innuttaasut ilarpassui ikiorneqarnissaminnik pisariaqartitsinerpaat pisortat
sullissiviinik naapitsinnerminni aporfissarpassuarnik naammaattuugaqartarput.

INUIT ATAQATIGIIT INATSISARTUNI



Taamaattoqarsinnaangilaq. Nakkutilliinerup tatiginninnerullu akornanni oqimaaqatigiissutsimik nutaamik nassaartariaqarpugut?

Naammangilaq pisortat ingerlatsiviinik annikillisaanissaq ullumikkut suliassanik agguaassisarneq aaqqissuussaanerlu aallaavigalugit. Apeqqu akiniagassarput unaavoq: Ukioq 2023-imi pisortat ingerlatsiviini ilisarnaatissaq suussava? Pisariillisaaneq ataqatigiissaakkamillu sullissineq qanoq iliorluta qulakkeersinnaavagut?

Aaqqissuusseqqinnermi illerngit sisamaat: Akileraartarnerup, atugarissaarnermi ineqarnermut utoqqarnullu ajunngitsorsiassat aaqqissuussiffigineqarnissaat.

Aaqqissuuseqqinnissami illerngit immikkoortortarpassualik. Inuit Ataqatigiit naatsorsuutigilluinnarpaat, immikkortortarpaalussuit tamakku ataqatigiissinnerisigut naligiinnngissuseq annikillisinneqarumaartoq aamma suliffissaqartitsineq annertusitinneqarumaartoq, taamaasilluni innuttaasut imminnut pilersornissaminnut periarfissavii amerlisinneqarlutik.

Suliffissaqartitsiniarnikkut isumaginnikkullu politikkit imminnut ataqatigiissarneqarnissaat, suliffissaqartitsiniartarnerullu ataatsimoorussatut siunnerfigineqalernissaa Inuit Ataqatigiit kissaatigaat. Inuusuttut inersimasullu ajornartorsiuteqartut ikiornissaannut pikkorinnerusariaqarpugut aamma ilinniagaqarnissaannut suliffissaqalernissaannullu qaninnerulersitsilluta.

Akileraartarnikkut aaqqissuuseqqinneq aallartereerpoq. Aningaasaqarnermut Naligiissitaanermullu Naalakkersuisumut partiit upernaap matuma ingerlanerani ataatsimiigjaqquneqarnikuupput. Aaqqissuusseqqinnermi inuit akileraarutaat siulliullugit aaqqissuuteqqinneqassapput. Akileraartarnermi %-imik, ilanngaateqartarnermullu tunngasunik pissusissamisuuinnartutut

INUIT ATAQATIGIIT INATSISARTUNI



eqqarsartalersimanerput Inuit Ataqatigiinniit unammillerniarparput, kissaatigaarpullu eqqaanerusumik pisariinnerusumillu aqqissuusisoqarnissaa. Neriutigaarput uku ataatsimoorussatut siunnerfigissagivut: isertitakinnerusut aamma akunnatunik isertitaqartarut malunnaateqarluartumik iluarsiiiffiqineqarnissaat.

Uttuineq aamma ataqatigiissumik nakkutillineq

Nalunaarusiami Naalakkersuisut nalunaarutigaa Napatitsinissamut Siuariartornissamullu pilersaarut 2 ukiumut saqqummiunneqassasoq. Taanna qilanaaraarput. Aningaasaqarnermut ataatsimiitaliami ilaasortaaitatta kissaatigisimavaat Aningaasaqarnermut Naalakkersuisumik ataatsimeeqateqarnissaq, Napatitsinissamut Siuariartornissamullu pilersaarut 2 tassani itisilerlugu oqaloqatigiissutigineqarsinnaaniassamat.

Maluginiarparput uuttuutit arlallit atorlugit suliaq ingerlanneqartoq, politikikkut pingaarnertut anguniakkat pilersaarummiittut siuariartorneri malinnaaffiqineqarsinnaaqqullugit. Inuit Ataqatigiit kissaatigaat suliap ingerlanneqarnerata killiffia ukiumut marloriarluni tamanit takuneqarsinnaasunngorlugu saqqummiunneqartassasoq.

Immikkut unammilligassaq tassaassaaq aqqissuusseqqinnermi illinernut sisamaasunut, aningaasarsiornerup ineriartorneranik aamma aningaasaqarnermut politikkimik, taakku tamaasa peqataatinneqarnissaat.

Inuit Ataqatigiinniit kissaatigaarput Naalakkersuisoqarfiit akimorlugit pisinnaasat piumassutsillu ullumikkornit annerusut ineriartortinneqarnissaat.

Naggasiut

Aaqqiissutissanik pisariitsunik sukkasuunillu nassaassaqaannginnera Inuit Ataqatigiinniit ilisimaarilluarparput. Taamaatumiguna inuit qinigaannik

INUIT ATAQATIGIIT INATSIARTUNI



Inatsisartoqartugut – ajornartorsiutit aporfusinnaasullu oqaasertalersinnaaqqullugit, sapiissuseqarluni aalajangigassat oqimaatsut aalajangersaaffigineqarsinnaaqqullugit, piviusunngortinnissaallu aalajangiusimallugit, siunertat piffissamut qanittuuppata ungasissumooraluarpataluunniit.

Asasakka inatsisartoqatit, suleqatigiilluarluta angusaqatigiilluarsinnaasorujussuuvugut – Aningaasanut inatsisit kingulliit marluk pillugit isumaqatigiissutit tamatumunnga uppersaataapput. Isumaqatigiinninniarpugut, naaperiaanerit pipput, aalajangersaaqatigiillutalu. Suleqatigiinnitsigut suli aalajangersinnaassuseqarnerput iliuuseqarsinnaanerunerpullu takutitsigu. Ingerlariaqqinnissamut aqqut aamma allannguutissanik pitsaasunik pilersitsisineq tassannga naaqqaveqarpoq. Maanna piffissanngorpoq, siunissamut atasussamik peqatigiilluta isumaqatigiissuteqarnissatsinnut.

Qujanaq

INUIT ATAQATIGIIT INATSIARTUNI

